



SLUŽBA ZA REVIZIJU FINANSIRANJA POLITIČKIH STRANAKA

Na osnovu člana 10. stav (1) Zakona o finansiranju političkih stranaka («Službeni glasnik BiH» broj 95/12 i 41/16), člana 25. Pravilnika o godišnjim finansijskim izvještajima političkih stranaka («Službeni glasnik BiH» broj 96/13, 89/16, 5/22 i 31/24) i člana 12. Pravilnika o administrativnim procedurama pregleda, kontrole i revizije finansijskih izvještaja političkih stranaka («Službeni glasnik BiH» broj 103/08, 5/22 i 39/25), izdajem

IZVJEŠTAJ O PREGLEDU GODIŠNJEG FINANSIJSKOG IZVJEŠTAJA ZA 2022. GODINU STRANKE PENZIONERA-UMIROVLJENIKA BOSNE I HERCEGOVINE

Broj: 03-07-6-438/23
Sarajevo, 23.12.2025. godine

S A D R Ź A J

MIŠLJENJE REVIZORA.....	3
1. UVOD.....	4
2. PREDSTAVLJANJE POLITIČKE STRANKE.....	4
3. OPIS PREGLEDA I KONTROLE FINANSIJSKOG IZVJEŠTAJA	5
Predmet pregleda i kontrole.....	5
Cilj pregleda i kontrole.....	5
Obim pregleda i kontrole.....	5
4. PRETHODNE KONTROLE I REVIZIJE.....	5
5. NALAZI I PREPORUKE.....	5
5.1 NALAZI.....	5
5.2 PREPORUKE	11

MIŠLJENJE REVIZORA

Služba za reviziju finansiranja političkih stranaka izvršila je pregled godišnjeg finansijskog izvještaja Stranke penzionera-umirovljenika Bosne i Hercegovine za 2022. godinu i finansijskog izvještaja za period od dana podnošenja prijave za ovjeru za izbore do dana ovjere rezultata Općih izbora, održanih 2022. godine.

Rukovodstvo političke stranke je odgovorno za finansijske izvještaje, postupanje stranke u skladu sa odredbama Zakona o finansiranju političkih stranaka i odredbama poglavlja 15 Izbornog zakona Bosne i Hercegovine, te uspostavljanje efikasnog sistema internih kontrola.

Pregled smo obavili u skladu sa revizijskim standardima primjenjivim na angažmanu u pregledu. Ovi standardi zahtijevaju da planiramo i izvršimo pregled da bi dobili umjerenu pouzdanost da stranka nije značajno kršila odredbe Zakona o finansiranju političkih stranaka.

Pregled je ograničen na kontrolu godišnjeg finansijskog izvještaja političke stranke i primjenu analitičkih procedura na podacima iz finansijskih izvještaja, pa prema tome ne obezbjeđuju pouzdanost koja bi se dobila izvršenom revizijom u prostorijama stranke.

Pregledom godišnjeg finansijskog izvještaja za 2022. godinu, utvrđeno je da je Stranka penzionera-umirovljenika Bosne i Hercegovine prekršila odredbe člana 4. stav (1), člana 5. stav (4), člana 11. stav (1) i člana 12. stav (1) i stav (4) Zakona o finansiranju političkih stranaka.

Na osnovu našeg pregleda, odnosno kontrole finansijskog izvještaja, osim gornje napomene, nismo zapazili ništa značajno što bi ukazalo na nedostatke u finansijskom izvještaju ili na finansiranje ove političke stranke suprotno odredbama Zakona o finansiranju političkih stranaka, niti na finansiranje troškova izborne kampanje suprotno odredbama člana 15.10 Izbornog zakona Bosne i Hercegovine.

1. UVOD

Služba za reviziju finansiranja političkih stranaka (u daljem tekstu: Služba za reviziju) izvršila je pregled godišnjeg finansijskog izvještaja Stranke penzionera-umirovljenika Bosne i Hercegovine za 2022. godinu i finansijskog izvještaja za period od dana podnošenja prijave za ovjeru za izbore do dana ovjere rezultata Općih izbora, održanih 2022. godine.

Pregled i kontrola finansijskog izvještaja su provedeni u skladu sa članom 25. Pravilnika o godišnjim finansijskim izvještajima političkih stranaka i članom 2. Pravilnika o administrativnim procedurama pregleda, kontrole i revizije finansijskih izvještaja političkih stranaka.

Zbog činjenice da nije obavljena revizija u prostorijama političke stranke, postoji mogućnost da pojedine materijalno značajne greške ne budu otkrivene.

Prema podacima iz godišnjeg finansijskog izvještaja za 2022. godinu, Stranka penzionera-umirovljenika Bosne i Hercegovine se finansirala iz sljedećih izvora:

R/B	Izvori finansiranja	Iznos (KM)	Struktura (%)
1.	Članarina	71.652,14	81,99
2.	Prilozi fizičkih lica (3-a)	6.300,00	7,21
3.	Prilozi pravnih lica (3-b)	0,00	0,00
4.	Prihodi od imovine (3-c)	0,00	0,00
5.	Prihodi od dobiti preduzeća u vlasništvu političke stranke (3-d)	0,00	0,00
6.	Prihodi od poklona (3-e)	550,00	0,63
7.	Prihodi iz budžeta (3-f)	8.870,56	10,15
8.	Prihodi od propagande (3-g)	0,00	0,00
I	Ukupni prihodi (1-8)	87.372,70	99,98
II	Ostali prihodi i drugo	14,32	0,02
	Izvori finansiranja (I+II)	87.387,02	100,00

U godišnjem finansijskom izvještaju za 2022. godinu Stranka penzionera-umirovljenika Bosne i Hercegovine je iskazala rashode u ukupnom iznosu od 85.292,61 KM.

2. PREDSTAVLJANJE POLITIČKE STRANKE

Naziv političke stranke je Stranka penzionera-umirovljenika Bosne i Hercegovine. Skraćeni naziv: SP-U BiH.

Stranka penzionera-umirovljenika Bosne i Hercegovine je registrovana kod Općinskog suda u Sarajevu, Rješenjem broj: R-I-4/02 od 23.04.2002. godine.

Sjedište političke stranke je u Sarajevu, Hasana Kikića 8.

Lica ovlaštena za zastupanje stranke su: Dževahid Sokić, predsjednik stranke i Zora Ostojić, potpredsjednica stranke.

Lice ovlašteno za podnošenje finansijskih izvještaja za 2022. godinu je Amela Kunić.

Prema podacima iz godišnjeg finansijskog izvještaja za 2022. godinu, Stranka penzionera-umirovljenika Bosne i Hercegovine ima sljedeću organizacionu strukturu:

- SPU Sarajevo,
- 3 kantonalna odbora i
- 29 općinskih odbora.

3. OPIS PREGLEDA I KONTROLE FINANSIJSKOG IZVJEŠTAJA

Predmet pregleda i kontrole je godišnji finansijski izvještaj Stranke penzionera-umirovljenika Bosne i Hercegovine za 2022. godinu i finansijski izvještaj za period od dana podnošenja prijave za ovjeru za izbore do dana ovjere rezultata Općih izbora, održanih 2022. godine.

Cilj pregleda i kontrole je da revizor na bazi finansijskog izvještaja pokuša da ustanovi da li je politička stranka u izvještajnom periodu postupala u skladu sa odredbama Zakona o finansiranju političkih stranaka i odredbama člana 15.10 Izbornog zakona Bosne i Hercegovine. Ukoliko revizor na bazi kontrole finansijskog izvještaja utvrdi određena kršenja navedenih zakona, ocjenjuje da li je potrebno izvršiti reviziju u prostorijama stranke da bi mogao izraziti mišljenje o tome da li se stranka finansirala u skladu sa Zakonom o finansiranju političkih stranaka, te da li je troškove izborne kampanje ostvarila u okviru zakonom utvrđenog limita.

Obim pregleda i kontrole finansijskog izvještaja Stranke penzionera-umirovljenika Bosne i Hercegovine obuhvata kontrolu i provođenje analitičkih procedura radi utvrđivanja usklađenosti podataka koje je stranka iskazala u finansijskom izvještaju sa odredbama Zakona o finansiranju političkih stranaka, odnosno usklađenosti izvora finansiranja i načina trošenja sredstava.

4. PRETHODNE KONTROLE I REVIZIJE

Pregled i kontrola finansijskih izvještaja Stranke penzionera-umirovljenika Bosne i Hercegovine izvršeni su u periodu od 2005. do 2021. godine, nakon kojih su izdati izvještaji o pregledu sa mišljenjem revizora, nalazima i preporukama revizije.

Nakon izvršenog pregleda godišnjeg finansijskog izvještaja za 2021. godinu, izdat je izvještaj o pregledu sa mišljenjem revizora, nalazima revizije i preporukama stranci da finansijska sredstva obezbijedena za finansiranje stranke koristi u skladu sa utvrđenim programom utroška sredstava, da prijavljuje sve priloge, da se ne finansira iz zabranjenih izvora, da vodi potpune i pravilne evidencije o svojim novčanim sredstvima na računima i blagajni, prihodima, rashodima i obavezama, odnosno da vodi poslovne knjige u skladu sa računovodstvenim propisima i da finansijske izvještaje koje podnosi Centralnoj izbornoj komisiji BiH popunjava u skladu sa Pravilnikom o godišnjim finansijskim izvještajima političkih stranaka.

Nerealizovane preporuke:

Na osnovu uočenih nedostataka u godišnjem finansijskom izvještaju za 2022. godinu, utvrđeno je da Stranka penzionera-umirovljenika Bosne i Hercegovine nije ispoštovala preporuke revizije.

5. NALAZI I PREPORUKE

5.1 NALAZI

a) Stranka penzionera-umirovljenika Bosne i Hercegovine prekršila je odredbe člana 4. stav (1) Zakona o finansiranju političkih stranaka¹.

U godišnjem finansijskom izvještaju za 2022. godinu Stranka penzionera-umirovljenika Bosne i Hercegovine iskazala je rashode u ukupnom iznosu od 85.292,61 KM.

Stranka penzionera-umirovljenika Bosne i Hercegovine je u Programu utroška sredstava za 2022. godinu planirala rashode u ukupnom iznosu od 100.000,00 KM.

Analizom programa utroška sredstava i pregledom godišnjeg finansijskog izvještaja, utvrđeno je da je Stranka penzionera-umirovljenika Bosne i Hercegovine planirane troškove prekoračila u iznosu od 8.337,43 KM, kako slijedi: troškove putnih troškova i dnevnica za 1.450,86 KM, poreze i doprinose po ugovoru o djelu i drugim oporezivim isplata za 450,97 KM, troškove naknada po ugovoru o

¹ Finansijska sredstva iz člana 3. stav (1) Zakona o finansiranju političkih stranaka, politička stranka može koristiti isključivo za ostvarivanje ciljeva utvrđenim svojim programom i statutom.

djelu za 1.006,45 KM, troškove reprezentacije za 197,95 KM, troškove interneta za 513,37 KM, troškove zakupnine poslovnog prostora za 837,54 KM, troškove kancelarijskog materijala za 136,37 KM, troškove štampanja, umnožavanja i slanja predizbornog materijala biračima za 1.981,04 KM, a ostale troškove propagande za 1.762,88 KM.

Programom utroška sredstava stranka je troškove putnih troškova i dnevnica planirala u iznosu od 6.000,00 KM, dok je u godišnjem finansijskom izvještaju ove troškove iskazala u iznosu od 7.450,86 KM.

Poreze i doprinose po ugovoru o djelu i drugim oporezivim isplatama politička stranka je planirala u iznosu od 6.500,00 KM, dok je u poslovnim knjigama navedene troškove iskazala u iznosu od 6.950,97 KM.

Politička stranka je troškove naknada po ugovoru o djelu planirala u iznosu od 28.000,00 KM, dok je iste u poslovnim knjigama iskazala u iznosu od 29.006,45 KM.

U programu utroška sredstava Stranka penzionera-umirovljenika Bosne i Hercegovine je planirala troškove reprezentacije u iznosu od 500,00 KM, a iste je ostvarila u iznosu od 697,95 KM.

Politička stranka je troškove interneta koje je planirala u iznosu od 1.700,00 KM, ostvarila u iznosu od 2.213,37 KM.

U godišnjem finansijskom izvještaju politička stranka je troškove zakupnine poslovnog prostora iskazala u iznosu od 12.337,54 KM, dok su u programu utroška ovi troškovi planirani u iznosu od 11.500,00 KM.

Politička stranka je troškove kancelarijskog materijala iskazala u iznosu od 1.236,37 KM, dok su u programu utroška ovi troškovi planirani u iznosu od 1.100,00 KM².

Programom utroška sredstava politička stranka je troškove štampanja, umnožavanja i slanja predizbornog materijala biračima planirala u iznosu od 4.000,00 KM, a ostale troškove propagande u iznosu od 2.500,00 KM. U godišnjem finansijskom izvještaju Stranka penzionera-umirovljenika Bosne i Hercegovine je troškove štampanja, umnožavanja i slanja predizbornog materijala biračima iskazala u iznosu od 5.981,04 KM, a ostale troškove propagande u iznosu od 4.262,88 KM.

S obzirom da je politička stranka finansijska sredstva u iznosu od 8.337,43 KM utrošila mimo programa sredstava, prekršila je odredbe člana 4. stav (1) Zakona o finansiranju političkih stranaka.

b) Stranka penzionera-umirovljenika Bosne i Hercegovine prekršila je odredbe člana 5. stav (4) Zakona o finansiranju političkih stranaka.

Politička stranka nije u poslovnim knjigama i godišnjem finansijskom izvještaju prijavila nenovčane donacije po osnovu besplatnog korištenja poslovnih prostora u Varešu i Zavidovićima, čime je prekršila je odredbe člana 5. stav (4) Zakona o finansiranju političkih stranaka.

- Uvidom u izjavu fizičkog lica Mušija Behdija od 13.01.2022. godine utvrđeno je da je navedeno fizičko lice za potrebe OO Vareš dalo na korištenje, bez naknade, prostor u Varešu u periodu od 01.01.2022. godine do 31.12.2022. godine. Prema izjavi vrijednost nenovčane naknade za korištenje poslovnog prostora je 50,00 KM.
- OO Zavidovići je na osnovu Odluke Općinskog vijeća Zavidovići o korištenju poslovne prostorije u vlasništvu Općine Zavidovići od 29.12.2021. godine i Ugovora o korištenju poslovne prostorije u vlasništvu Općine Zavidovići broj: 14/2022 od 14.01.2022. godine, u toku 2022. godine besplatno koristila poslovnu prostoriju-kancelariju, površine 13 m², u vlasništvu ove općine.

² U odnosu na preliminarne izvještaj o pregledu precizirana je vrsta troška i iznos prekoračenja, bez izmjene ukupnog iznosa prekoračenja planiranih troškova.

c) Stranka penzionera-umirovljenika Bosne i Hercegovine prekršila je odredbe člana 11. stav (1) i člana 12. stav (1) i stav (4) Zakona o finansiranju političkih stranaka.

Na osnovu obavljenog pregleda godišnjeg finansijskog izvještaja, utvrđeno je da Stranka penzionera-umirovljenika Bosne i Hercegovine nije vodila pravilne, pravovremene i potpune evidencije o novčanim sredstvima, prihodima, rashodima i obavezama i nije obrasce godišnjeg finansijskog izvještaja popunila u skladu s odredbama Pravilnika o godišnjim finansijskim izvještajima političkih stranaka (u daljem tekstu: Pravilnik), čime su prekršene odredbe člana 11. stav (1) i člana 12. stav (1) i stav (4) Zakona o finansiranju političkih stranaka.

- (1) Stranka penzionera-umirovljenika Bosne i Hercegovine nije popunila obrazac 2 (pregled prometa svih transakcijskih računa političke stranke) godišnjeg finansijskog izvještaja u skladu sa odredbama člana 11. Pravilnika.

Politička stranka ni u poslovnim knjigama nije uspostavila pravilne i potpune evidencije o prometu i stanju novca na transakcijskim računima. Uvidom u poslovne knjige i dokumentaciju koja je postupku pregleda prikupljena, utvrđeno je da je u poslovnim knjigama za 2022. godinu, na analitičkim karticama prometa putem transakcijskih računa evidentiran i promet ostvaren putem transakcijskih računa u toku 2021. godine, kao i da su evidentirani transakcijski računi koji su ugašeni u toku 2021. godine. Politička stranka je u poslovnim knjigama iskazala da na ugašenim računima na dan 31.12.2022. godine ima novčana sredstva, odnosno negativan saldo novca.

Uvidom u raspoloživu dokumentaciju, utvrđeno je sljedeće:

- Politička stranka je u poslovnim knjigama i obrascu 2 godišnjeg finansijskog izvještaja iskazala transakcijske račune organizacionih dijelova političke stranke, KO Tuzla broj: 3387302217662498 i odbora Tuzla broj: 3387302217633010 kod UniCredit bank d.d., koji su prema podacima iz Jedinstvenog registra računa u Bosni i Hercegovini ugašeni u toku 2021. godine.

Politička stranka je u poslovnim knjigama i obrascu 2 za transakcijski račun KO Tuzla broj: 3387302217662498 iskazala sljedeće podatke o prometu i stanju: početno stanje na dan 01.01.2022. godine u iznosu od 0,00 KM, ukupan promet ulaza u iznosu od 66,20 KM, ukupan promet izlaza u iznosu od 78,63 KM i stanje na dan 31.12.2022. godine u iznosu od -12,10 KM.

Za transakcijski račun odbora Tuzla broj: 3387302217633010, politička stranka je u poslovnim knjigama i godišnjem finansijskom izvještaju iskazala sljedeće podatke o prometu i stanju novca: početno stanje na dan 01.01.2022. godine u iznosu od -132,85 KM, ukupan promet ulaza u iznosu od 227,60 KM, ukupan promet izlaza u iznosu od 320,80 KM i stanje na dan 31.12.2022. godine u iznosu od -226,05 KM.

Uvidom u poslovne knjige, utvrđeno je da je politička stranka u poslovnim knjigama za 2022. godinu, na analitičkim karticama prometa putem transakcijskih računa KO Tuzla i odbora Tuzla evidentirala promet ostvaren putem navedenih računa u 2021. godini.

- Politička stranka je u obrascu 2 godišnjeg finansijskog izvještaja iskazala transakcijske račune kod UniCredit bank d.d. broj: 3389002205919496, 3389002205911251, 3386902231579593 i 3385802224020826, koji su prema podacima koje je dostavila UniCredit bank d.d. Mostar, ugašeni u toku 2021. godine.

Naime, politička stranka je u obrascu 2 godišnjeg finansijskog izvještaja iskazala transakcijski račun KO Sarajevo broj: 3389002205919496, sa sljedećim podacima: početno stanje na dan 01.01.2022. godine u iznosu od 33,37 KM, ukupan promet ulaza u iznosu od 0,00 KM, ukupan promet izlaza u iznosu od 0,00 KM i stanje na dan 31.12.2022. godine u iznosu od 33,37 KM.

Za transakcijski račun odbora Stari Grad Sarajevo broj: 3389002205911251 iskazani su sljedeći podaci o stanju i prometu: početno stanje na dan 01.01.2022. godine u iznosu od

18,51 KM, ukupan promet ulaza u iznosu od 0,00 KM, ukupan promet izlaza u iznosu od 0,00 KM i stanje na dan 31.12.2022. godine u iznosu od 18,51 KM.

Politička stranka je za transakcijski račun odbora Novi Grad Sarajevo broj: 3386902231579593 iskazala početno stanje na dan 01.01.2022. godine u iznosu od 183,06 KM, ukupan promet ulaza u iznosu od 0,00 KM, ukupan promet izlaza u iznosu od 0,00 KM i stanje na dan 31.12.2022. godine u iznosu od 183,06 KM.

U godišnjem finansijskom izvještaju iskazani su sljedeći podaci o stanju i prometu transakcijskog računa odbora Vareš broj: 3385802224020826: početno stanje na dan 01.01.2022. godine u iznosu od -74,44 KM, ukupan promet ulaza u iznosu od 0,00 KM, ukupan promet izlaza u iznosu od 0,00 KM i stanje na dan 31.12.2022. godine u iznosu od -74,44 KM.

Stranka i u poslovnim knjigama vodi ugašene transakcijske račune za koje je na dan 31.12.2022. godine iskazala saldo, kako slijedi: transakcijski račun KO Sarajevo broj: 3389002205919496 u iznosu od 33,37 KM, transakcijski račun odbora Stari Grad Sarajevo broj: 3389002205911251 u iznosu od 18,51 KM, transakcijski račun odbora Novi Grad Sarajevo broj: 3386902231579593 u iznosu od 183,06 KM i transakcijski račun odbora Vareš broj: 3385802224020826 u iznosu od -74,44 KM.

- U obrascu 2 godišnjeg finansijskog izvještaja politička stranka je iskazala transakcijski račun odbora u Glamoču broj: 1549995000138981 kod Intesa Sanpaolo banke d.d. BiH sa sljedećim podacima o prometu i stanju: početno stanje na dan 01.01.2022. godine u iznosu od 2.331,03 KM, ukupan promet ulaza u iznosu od 186,50 KM, ukupan promet izlaza u iznosu od 2.715,53 KM i stanje na dan 31.12.2022. godine u iznosu od -198,00 KM.

Kontrolom izvoda sa navedenog računa utvrđeno je da je početno stanje na dan 01.01.2022. godine iznosilo 2.529,03 KM, ukupan promet ulaza 186,50 KM, ukupan promet izlaza 2.715,53 KM, a stanje na dan 30.08.2022. godine, kada je račun i ugašen, u iznosu od 0,00 KM.

- U obrascu 2 godišnjeg finansijskog izvještaja politička stranka je iskazala transakcijski račun odbora Lukavac broj: 1321200311693881 kod NLB Banke d.d. sa sljedećim podacima: početno stanje na dan 01.01.2022. godine u iznosu od 905,90 KM, ukupan promet ulaza u iznosu od 0,00 KM, ukupan promet izlaza u iznosu od 0,00 KM i stanje na dan 31.12.2022. godine u iznosu od 905,90 KM.

Uvidom u Valutnu karticu računa broj: 1321200311693881, utvrđeno je da je početno stanje na dan 01.01.2022. godine iznosilo 367,70 KM, ukupan promet ulaza 0,00 KM, ukupan promet izlaza 367,70 KM, te stanje na dan 30.09.2022. godine, odnosno 31.12.2022. godine 0,00 KM.

- Prema podacima koje je dostavila NLB Banka d.d. računi političke stranke broj: 1322700309772527 i 1321902016887498 su ugašeni, odnosno nije bilo prometa po ovim računima u toku 2022. godine. Politička stranka, međutim, u svojim poslovnim knjigama i godišnjem finansijskom izvještaju iskazuje da na navedenim računima na dan 31.12.2022. godine ima novčana sredstva, kako slijedi: račun odbora Teočak broj: 1322700309772527 u iznosu od 314,20 KM i račun odbor Gradačac broj: 1321902016887498 u iznosu od 167,05 KM.

- (2) Politička stranka nije u poslovnim knjigama uspostavila pravilne evidencije o poslovanju gotovinom putem blagajne i nije u obrascu 2-1 (pregled stanja blagajne) godišnjeg finansijskog izvještaja iskazala tačne i potpune podatke o prometu i stanju blagajne, čime je prekršila odredbe člana 12. Pravilnika.

- Uvidom u Valutnu karticu računa odbora Lukavac broj: 1321200311693881, utvrđeno je dana 12.09.2022. godine izvršena gotovinska isplata sredstava blagajni u iznosu od 287,00 KM. Stranka u poslovnim knjigama nije evidentirala ulaz sredstava u blagajnu u iznosu od 287,00 KM.

- U poslovnim knjigama i obrascu 2-1 godišnjeg finansijskog izvještaja politička stranka je iskazala negativan saldo novca na dan 01.01.2022. godine, odnosno 31.12.2022. godini u blagajni sljedećih odbora: Novi Grad Sarajevo u iznosu od -24,97 KM, Kakanj u iznosu od -17,91 KM, Lukavac u iznosu od -56,56 KM, Visoko u iznosu od -115,01 KM i Živinice u iznosu od -16,40 KM. Takođe, u finansijskom izvještaju je navedeno da odbori Novi Grad Sarajevo, Kakanj, Lukavac, Visoko i Živinice tokom 2022. godine nisu imali promet putem blagajne.

S obzirom da se iz blagajne ne može potrošiti više novca nego što ona posjeduje, konto blagajne ne može imati potražni (negativan) saldo.

- Politička stranka u poslovnim knjigama, na kontu 1009-*prelazni konto* iskazuje saldo na dan 31.12.2022. godine u iznosu od 8.236,82 KM, što ukazuje da nisu evidentirane sve poslovne promjene, odnosno da politička stranka ne vodi poslovne knjige u skladu sa računovodstvenim propisima.

Prelazni konto služi za privremenu evidenciju poslovnog događaja do njegovog konačnog evidentiranja na samostalnom kontu, tj. kao privremeni konto između novčanih konta, i na datum sastavljanja finansijskog izvještaja ne smije imati saldo.

(3) Politička stranka u godišnjem finansijskom izvještaju nije pravilno iskazala članarine i priloge fizičkih lica, čime je prekršila odredbe člana 13. i 14. Pravilnika.

- Kontrolom uplata članarine u gotovini OO Centar utvrđeno je da je, dana 18.11.2022. godine, od fizičkih lica Lasica Željka i Šimić Vlatka naplaćena članarina u iznosima od po 20,00 KM, što je više u odnosu na iznos utvrđen Odlukom o visini i načinu prikupljanja članarine u SPU BiH.

Naime, članom 2. Odluke o visini i načinu prikupljanja članarine u SPU BiH, broj: 01-333/21 od 25.01.2021. godine, propisano je da najniža mjesečna članarina iznosi 1,00 KM, odnosno 12,00 KM godišnje, te je članovima ostavljeno da samostalno odluče o visini mjesečne članarine koju će plaćati.

Imajući u vidu odredbe člana 5. stav (1) i stav (2) Zakona o finansiranju političkih stranaka kojim je propisano da se članarinom smatra redovni novčani iznos koji član političke stranke plaća na način i pod uslovima utvrđenim njenim statutom ili drugim aktom, te da se dobrovoljnim priložima smatraju povremene ili redovne uplate kojima fizička ili pravna lica dobrovoljno daju novac političkoj stranci u iznosu većem od iznosa članarine, smatramo da sredstva koja su uplaćena iznad propisanog iznosa godišnje članarine od 12,00 KM čine priloge fizičkih lica, koje je politička stranka bila dužna iskazati u obrascu 3-a (prilozi fizičkih lica) godišnjeg finansijskog izvještaja.

- Dana 15.11.2022. godine u blagajnu OO Novo Sarajevo uplaćena je članarina Baltić Ane za 2021. godinu u iznosu od 12,00 KM. Politička stranka je članarinu za 2021. godinu evidentirala kao prihode iz ranijih godina, te iskazala u obrascu 3 (izvori finansiranja političke stranke) kao ostale prihode.

Stranka je članarinu za 2021. godinu koja je naplaćena u 2022. godini u godišnjem finansijskom izvještaju trebala iskazati kao prihode od članarine, a ne kao ostale prihode.

- Stranka penzionera-umirovljenika Bosne i Hercegovine nije u obrascu 3-a (prilozi fizičkih lica) godišnjeg finansijskog izvještaja navela podatke o broju potvrde, čime je prekršila odredbe člana 14. Pravilnika.

(4) Politička stranka nije u poslovnim knjigama i godišnjem finansijskom izvještaju iskazala nenovčane donacije po osnovu besplatnog korištenja poslovnih prostorija u Varešu i Zavidovićima, čime je prekršila odredbe člana 13. i 18. Pravilnika.

(5) Potvrde o primljenim priložima ne sadrže elemente koji su propisani odredbama člana 6. Pravilnika.

Uvidom u potvrde o primitku donacija koje je politička stranka izdala fizičkim licima, utvrđeno je da je na potvrdama umjesto broja ličnog dokumenta, naveden jedinstveni matični broj, te da na jednoj potvrdi nije navedena adresa i mjesto prebivališta donatora.

U skladu s odredbama iz člana 6. Pravilnika, politička stranka je dužna svakom fizičkom i pravnom licu od kojeg je primila članarinu ili prilog izdati potvrdu u kojoj su sadržani sljedeći podaci: naziv političke stranke, serijski broj potvrde, ukupan iznos članarine/priloga, ime i prezime/naziv donatora, broj ličnog dokumenta/identifikacioni broj donatora, adresa i mjesto prebivališta/sjedišta donatora, datum uplate, datum izdavanja potvrde i potpis ovlaštenog lica.

(6) Stranka penzionera-umirovljenika Bosne i Hercegovine nije u poslovnim knjigama i godišnjem finansijskog izvještaja pravilno iskazala rashode i obaveze, čime je prekršila odredbe člana 21, 22. i 24. Pravilnika.

- Stranka penzionera-umirovljenika Bosne i Hercegovine nije u poslovnim knjigama i godišnjem finansijskog izvještaja iskazala troškove zakupnine poslovnih prostorija u Varešu i Zavidovićima, te troškove zakupnine poslovnih prostorija koje je koristila OO Centar Sarajevo u januaru 2022. godine.
- Uvidom u poslovne knjige utvrđeno je da politička stranka nije evidentirala troškove telefonskih usluga za decembar 2022. godine, čime nisu evidentirane i iskazane sve obaveze prema dobavljaču.
- Stranka penzionera-umirovljenika Bosne i Hercegovine u godišnjem finansijskom izvještaju nije iskazala troškove platnog prometa odbora Lukavac. Prema podacima iz Valutne kartice računa odbora Lukavac broj: 1321200311693881, troškovi platnog prometa putem ovog računa su iznosili 80,70 KM.
- Politička stranka u poslovnim knjigama na kontu 1288-*ostala nespomenuta kratkoročna potraživanja* na dan 31.12.2022. godine iskazuje saldo u iznosu od 8.731,64 KM, od čega je 2.875,34 KM preneseno početno stanje na dan 01.01.2022. godine sa konta 1280-*ostala kratkoročna potraživanja*, a 3.132,85 KM je preknjiženo sa konta 12800-*ostala kratkoročna potraživanja*. Navedeno ukazuje da stranka ne vodi pravovremene i potpune evidencije o svojim rashodima.

(7) Uvidom u finansijsku dokumentaciju političke stranke i knjigovodstvene isprave utvrđeni su nedostaci kod dijela računa dobavljača koji su knjigovodstvene isprave o nastalim poslovnim događajima.³

- Na računima dobavljača „Alfa & Omega marketing“ d.o.o. Tešanj broj: 09-14/22 od 09.09.2022. godine u iznosu od 3.018,60 KM i broj: 09-15/22 od 09.09.2022. godine u iznosu od 3.190,00 KM nije potvrđen prijem robe. Takođe, računi nisu ovjereni za knjiženje i plaćanje.

Isto tako, na računima dobavljača “Foto Jusuf” broj: 172 od 02.09.2022. godine u iznosu od 256,00 KM, “Papirus” d.o.o Sarajevo broj: 1187/22 od 16.09.2022. godine u iznosu od 52,65 KM i JU “Penzionerski dom sa stacionarom Zeničko-dobojskog kantona” broj: 2013UF-22 od 08.09.2022. godine u iznosu od 200,00 KM, nije potvrđen prijem robe/usluge. Računi, takođe, nisu ovjereni za knjiženje i plaćanje.

- Politička stranka je u svrhu izborne kampanje, a na osnovu odluka isplatila putne troškove predsjedniku KO Zenica i naknade za pruženje usluga za predizbornu kampanju za tri lica u ukupnom iznosu od 350,00 KM. Uvidom u odluke utvrđeno je da odluke nisu potpisane od strane odgovornog lica.

³ U skladu sa računovodstvenim propisima, knjigovodstvena isprava mora biti potpuna, istinita, računski tačna i uredna, sačinjena tako da omogućava potpun uvid u vjerodostojnost dokumenta. Sadržaj knjigovodstvene isprave mora nedvojbeno i vjerodostojno pokazivati vrstu i obim nastale promjene (kupovina, količina, cijena, ukupan iznos), karakter poslovne promjene u knjigovodstveno-tehničkom smislu, tehnička obilježja i sl.

Troškovi izborne kampanje

Prema odredbama člana 15.10 Izbornog zakona BiH, politička stranka za potrebe izborne kampanje ne smije potrošiti više od 0,30 odnosno 0,20 KM⁴ po biraču u svakom izbornom krugu, prema broju birača koje je objavila Centralna izborna komisija BiH. Prema podacima Centralne izborne komisije BiH, Stranka penzionera-umirovljenika Bosne i Hercegovine je u svrhu izborne kampanje za Opće izbore 2022. godine mogla potrošiti sredstva u iznosu od 556.995,35 KM.

Stranka penzionera-umirovljenika Bosne i Hercegovine je u godišnjem finansijskom izvještaju za 2022. godinu iskazala troškove izborne kampanje u iznosu od 11.378,99 KM, dok je u postizbornom finansijskom izvještaju za 2022. godinu iskazala troškove izborne kampanje u iznosu od 11.423,60 KM.

5.2 PREPORUKE

Preporučuje se Stranci penzionera-umirovljenika Bosne i Hercegovine da se pridržava odredaba Zakona o finansiranju političkih stranaka, a posebno na osnovu uočenih nedostataka se preporučuje:

- *da finansijska sredstva obezbijeđena za finansiranje stranke koristi u skladu s utvrđenim planom utroška sredstava,*
- *da, u skladu s odredbom člana 5. stav (4) Zakona o finansiranju političkih stranaka, sve priloge prijavljuje u finansijskom izvještaju,*
- *da vodi poslovne knjige u skladu sa računovodstvenim propisima, odnosno da uspostavi pravilne, pravovremene i potpune evidencije o novčanim sredstvima, prihodima, rashodima i obavezama,*
- *da finansijske izvještaje koje podnosi Centralnoj izbornoj komisiji Bosne i Hercegovine popunjava u skladu sa Pravilnikom o godišnjim finansijskim izvještajima političkih stranaka i*
- *da izvrši popis imovine i obaveza i provede odgovarajuća knjiženja u svojim poslovnim knjigama.*

KOMENTAR:

U ostavljenom roku, Stranka penzionera-umirovljenika Bosne i Hercegovine dostavila je primjedbe na nalaze revizije i mišljenje revizora dato u Preliminarnom izvještaju o pregledu godišnjeg finansijskog izvještaja za 2022. godinu. Uz primjedbe, politička stranka je dostavila korigovane obrasce 4.1 odbora Visoko i Kalesija, čime je djelimično otklonila nedostatke u popunjavanju godišnjeg finansijskog izvještaja za 2022. godinu. Stranka penzionera-umirovljenika Bosne i Hercegovine je dana 25.12.2025. godine izvršila plaćanje naknade za korištenje poslovne prostorije u vlasništvu Općine Centar Sarajevo u iznosu od 369,72 KM, čime je izvršila povrat zabranjene nenovčane donacije.

Služba za reviziju je uvažila sve argumentovane primjedbe političke stranke i u skladu sa istim korigovala nalaze revizije iz preliminarog izvještaja.

Šef Odsjeka za revizijske poslove, revizor

Sanja Tošović

Revizor

Tanja Golijanin

⁴ Član 15.10 stav 2. Izbornog zakona BiH propisuje da se maksimalno dozvoljeni iznos za finansiranje izborne kampanje izračunava tako što se broj glasača u svim izbornim jedinicama u kojima politički subjekt ima kandidatsku listu ili kandidata pomnoži sa: 30 feninga za načelnika opštine odnosno gradonačelnika i za članove skupštine opštine, članove Narodne skupštine RS i Predstavničkog doma Parlamenta Federacije BiH, članove Parlamentarne skupštine BiH, člana Predsjedništva BiH, i predsjednika i potpredsjednike RS, odnosno 20 feninga za izbore za članove kantonalnih skupština.